

和韋開州盛山 十二首

宿雲亭

清淨當深處
虛明向遠開
卷簾無俗客
應只見雲來

桃塢

春塢桃花發
多將野客遊
日西殊未散
看酒缸頭

梅溪

自愛新梅好
行尋一徑斜
不教人掃石
恐損



落來花

茶嶺

紫芽連白蘂初向嶺頭生
自看家人摘尋常
觸路行

流盃渠

綠酒白螺盃隨流去復回
似知人把處各向
面前來

盤石磴

壘石連空遠層層勢更危
不知行幾匝得到

上頭時

竹巖

獨入千竿裏綠岩踏石層
筍頭齊欲出更不
許人登

琵琶臺

臺上綠蘿春閑登不待人
每當休暇日着屐
戴綸巾

胡蘆沼

曲沼春流滿新蒲映綠鵝
閑齋朝飯後拄杖

繞行多

隱月岫

月出深峯裏清光夏亦寒每嫌西落疾不得
到明看

繡衣石榻

山城無別味藥菜兼魚果時引繡衣人同來
石上坐

上士泉

以上十二首係盛山詩

堦上一眼泉四邊青石甃唯待護淨僧添餅

與盥漱

涇州塞

行到涇州塞唯聞羌戍聲道邊發古堠猶記
向安西

送遠客

憔悴遠行客慙慙欲別杯九星壇下路幾日
見重來

寄西峯僧

松暗水涓涓夜涼人未眠西峯月猶在遙憶

草堂前

禪師

獨在西峯頂年年閉石房定中無弟子人到
爲焚香

惜花

山中春已晚處處見花稀明日來應盡林間
宿不歸

題暉禪師影堂

早日欲參禪音無相識緣道場今獨到惆悵

影堂前

七言

登樓寄胡家兄弟

獨上西樓盡日閑林煙演漾鳥綿蠻謝家兄
弟重城裏不得同看雨後山

荅劉明府

身病多時又客居滿城故舊久相踈可憐絳
縣劉明府獨解頻頻寄遠書

酬藤杖

病裏出門行步遲喜君相贈古藤枝倚來自
覺身生力每向傍人說得時

法雄寺東樓

汾陽舊宅今爲寺猶有當時歌舞樓四十年
來車馬絕古槐深巷暮蟬愁

寄故人

靜曲閑門病客居蟬聲滿樹槿花踈故人只
在藍田縣強半年來不得書

感春

遠客悠悠任病身謝家池上又逢春明年各
自東西去此地看花是別人

贈李司議

漢庭誰問投荒客十載天南着白衣秋草漫
漫惡溪路嶺頭還送北人歸

別客

青山歷歷水悠悠今日相逢明日秋繫馬城
邊楊樹下爲君沽酒暫淹留

寄府吏

野水尋花共作期今朝出郭不相隨待君公
事有閑日此地春光應過時

弟蕭遠雪夜同宿

數卷新遊蜀客詩長安僻巷得相隨草堂雪
夜携琴宿說似青城館裏時

同白侍郎杏園贈劉郎中

一去瀟湘頭已白今朝始見杏園春從來遷
客應無數重到花前有幾人

尋仙

溪頭一逕入青崖處處仙居隔杏花更見峯
西幽客說雲中猶有兩三家

秋思

洛陽城裏見秋風欲作歸書意萬重復恐匆
匆說不盡行人臨發又開封

憶遠

行人猶未有歸期萬里初程日暮時唯愛門
前雙柳樹枝枝葉葉不相離

玉仙館

長溪新雨色如泥
野水陰雲盡向西
楚客天南行漸遠
山山樹裏鷓鴣啼

倡女詞

輕鬢叢梳闊掃眉
爲嫌風日下樓稀
畫羅金縷難相稱
故着尋常淡薄衣

荅元八遺紗帽

黑紗方帽君邊得
稱對山前坐竹牀
惟恐被人偷翦樣
不魯閑戴出書堂

題僧院

聞師行講青龍院
本寺往來多少年
靜掃空房唯獨坐
千莖秋竹在簷前

題故僧影堂

香銷雲凝舊僧家
僧刹殘形半壁斜
日暮松煙寒漠漠
秋風吹破絳蓮花

送元八

百神齋祭相隨遍
尋水看山亦共行
明日城西送君去
舊遊重到獨題名

吳楚歌詞

庭前春鳥啄林聲紅夾羅襦縫未成今朝社
日停針線起向朱櫻樹下行

題方瞳上人月觀臺

一身清淨無童子獨坐空堂得幾年每夜焚
香通月觀可憐光影最團圓

寄宋景

詔發官兵取亂臣將軍弓箭不離身君今獨
在征東府莫遣功名屬別人

寄王奉御

愛君紫閣峯前好新作書堂藥竈成見欲移
居相近住有田多與種黃精

題渭北寺上方

昔祭郊壇今謁陵寺中高處重來登十餘年
外人多別喜見當時轉讀僧

題山寺僧院

終日不離塵土間若爲人一作能見此身閑今

朝暫共遊僧語更恨多時別舊山

送客遊蜀

行盡青山到益州錦城樓下二江流杜家曾
向此間住爲到浣花溪水頭

憶故山

壘石爲山伴野夫仍收靈藥讀仙書如今身
是千名一作他州客每見青山憶舊居

贈陸暢

共踏長安街裏塵吳州獨作未歸身胥門舊
宅今誰住君過西塘與問人

荅鄱陽客藥名詩

江臯歲暮相逢地黃葉霜前半夏枝子夜吟
詩向松桂心中萬事喜君知

華岳廟

金天廟下京西道巫女紛紛走似煙手把紙
錢迎過客遣求恩福到神前

弱栢院僧影堂

弱栢倒垂如線蔓簷頭不見有枝柯影堂香
火長相續應得人來禮拜多

病中酬元宗簡

東風漸漸滿城春，獨向深房養病身。
莫說櫻桃花已發，今年不作看花人。

寺宿齋

晚到金光門外寺，寺中新竹隔簾多。
齋官禁與僧相見，院院開門不得過。

贈施肩吾

世間漸覺無多事，雖得空名未着身。
合取藥成相待喫，不須先作上天人。

贈王建

自君去後交遊少，東野無來篋笥貧。
賴有白頭王建在，眼前猶見詠詩人。

逢賈島

僧房逢着款冬花，出寺行吟日已斜。
十二街中春雪滿，馬蹄今去又誰家。

春日早朝

曉陌春寒朝騎來，瑞煙深處見樓臺。
夜來新雨沙堤濕，東上閣門應未開。

涼州詞三首

邊城暮雨鴈飛低
蘆笋初生漸欲齊
無數鈴聲遙過磧
應馱白練到安西
古鎮城門白磧開
胡兵往往傍沙堆
巡邊使客行應早
每待平安火到來
鳳林關裏水東流
白草黃榆六十秋
邊將皆承明主澤
渾無人道取涼州

宮詞二首

新鷹初放兔猶肥
白日君王在內稀
薄暮千門臨欲鎖
紅粧飛騎向前歸

黃金捍撥紫檀槽
絃索初張調更高
盡理昨來新上曲
內官簾外送櫻桃

華清宮

溫泉流入漢離宮
宮樹行行浴殿空
武帝時人今欲盡
青山空閉御牆中

崔駙馬養鶴

身閑無事稱高情
已有人間章句名
求得鶴來教翦翅
望仙臺下亦將行

閑遊

老身不計人間事野寺秋晴每獨過病眼校
來猶斷酒却嫌行處菊花多

劉兵曹贈酒

一餅顏色似秋泉開向新栽小竹前飲罷身
中更無事移牀獨就夕陽眠

送梧竹王使君

楚江亭上秋風起看發蒼梧太守船千里同
行從此別相逢又隔幾多年

寄朱闕二山人

爲箇朝章束此身眼看東路去無因歷陽舊
客今應少轉憶鄰家二老人

寄李激

五度溪頭躑躅紅高陽寺裏講時鐘春山處
處行應好一月看花到幾峯

鄰婦哭征夫

雙鬟初合便分離萬里征夫不得隨今日軍
迴身獨歿去時鞍馬別人騎

和崔駙馬聞蟬

鳳凰樓上多歡樂不覺秋風暮雨天應為昨
來身暫病蟬聲得到耳傍邊

和裴僕射看櫻桃花

昨日南園新雨後櫻桃花發舊枝柯天明不
待人同看繞樹重重履跡多

和長安郭明府與友人縣中會飲

一樽新酒兩人同好在街西水縣中自恨病
身相去遠此時閑坐對秋風

興唐觀看花

新紅舊紫不相宜看覺從前兩月遲更向同
來詩客道明年到此莫過時

九華觀看花

街西無數閑遊處不似九華仙觀中花裏可
憐池上景幾重牆壁貯春風

贈姚合

丹鳳城門向曉開千官相次入朝來唯君獨
走衝塵土下馬橋邊報直迴

同韋負外開元觀尋道士

觀裏初晴竹樹涼
閑行共到最高房
昨來官罷無生計
欲就師求斷穀方

同韓侍郎南谿夜賞

喜作閑人得出城
南谿兩月逐君行
忽聞新命須歸去
一夜船中語到明

使行至悟真寺

採玉峯連佛寺幽
高高斜對驛門樓
無端來去騎高馬
寸步教身不得遊

重陽日至硤道

無限青山行已盡
迴看忽覺遠離家
逢高欲飲重陽酒
山菊今朝未有花

贈主客劉郎中

憶昔君登南省日
老夫猶是褐衣身
誰知二十餘年後
來作客曹相替人

同嚴給事聞唐昌觀玉蕊院近有仙

過因成絕句

二首

千枝花裏玉塵飛
阿母宮中見亦稀
應共諸仙鬪百草
獨來偷折一枝歸

五色雲中紫鳳車
尋仙來到洞仙家
飛輪迴處無蹤跡
惟有班班落地花

送蜀客

蜀客南行祭碧雞
木綿花發錦江西
山橋日晚行人少
時見猩猩樹上啼

宮山詞

秋草宮人斜裏暮
宮中誰送葬來時
千千萬萬皆相似
家在城邊亦不知

美人宮碁

紅燭臺前出翠娥
海沙鋪局巧相和
趁行移子巡收盡
數數看誰得最多

蠻州

瘴水蠻中入洞流
人家多住竹棚頭
青山海上無城郭
惟見松牌記象州

送元宗簡

貂帽垂肩窄皂裘
雪深騎馬向西州
暫時相見還相別
閉却閑門依舊愁

寄徐晦

鄠陂魚美酒偏濃不出琴齋見雪峯應勝昨
來趨府日簿書牀上亂重重

寄白學士

自掌天書見客稀縱因休沐鎖雙扉幾回扶
病欲相訪知向禁中歸未歸

題玉像堂

玉毫不着世間塵輝映分明十八身入夜無
煙燈亦一作好堂中唯有轉經人

與賈島閑遊

水北原南草色新雪銷風暖不生塵城中車
馬應無數解出閑行有幾人

哭丘長史

丘公已沒故人稀欲過街西更訪誰每到子
城東路上憶君相逐入朝時

哭孟郊

一作孟寂

曲江院裏題名處十九人中最少年今日春
光君不見杏花零落寺門前

患眼

三年患眼今年校免與風光便隔生昨日韓
家後園裏看花猶似未分明

荅劉兢

劉君久被時拋擲老向城中作選人昨日街
西相近住每來存問老夫身

贈華嚴院僧

一身依止荒閑院燭耀窓中有宿煙徧禮法
華經裏字不曾行到寺門前

逢故人

山東二十餘年別今日相逢在上都說盡向
來無限事相看摩捋白髭鬚

送蕭遠弟

街北槐花傍馬垂病身相送出門遲與君別
後秋風夜作得新詩說向誰

送辛少府任樂安

才多不肯浪容身老大詩章轉更新選得天
台山下縣一家渾作學仙人

贈任道士

長安多病無生計藥舖醫人亂索錢欲得定
知身上事憑君爲算小行年

招周處士

閉門秋雨濕牆莎俗客來稀野思多已掃書
堂安藥竈山人作意早經過

送許處士

高情自與俗人踈獨向藍谿僻處居會對白
雲長取醉不能窻下讀閑書

送律師歸婺州

京中開講已多時曾作壇頭證戒師歸到雙
溪橋北寺鄉僧爭就學威儀

題楊祕書新居

愛閑不向爭名地稱在街西最靜坊卷裏詩
過一千首白頭新授祕書郎

送眭師

九星壇下煎茶別五老峯前覓寺居作得新
詩旋相寄人來請莫達空書

送僧歸金州

聞道漢陰山水好師行一一徧經過事須覓
取堪居處若箇谿邊藥最多

尋徐道士

尋師遠到暉天觀竹院森森閑藥房聞入靜
來經七日仙童簷下獨焚香

答開州韋使君寄車前子

開州午日車前子作藥人皆道有神慚愧使
君憐病眼二千里外寄閑人

蠻中

銅柱南邊毒草春行人幾日到金麟玉環穿
耳誰家客自抱琵琶迎海神

贈道士

茅山近別剡谿逢玉節青旄十二重自說年
年上天去羅浮最近海邊峯

望平驛作

茫茫菰草平如地渺渺長堤曲似城日暮未
知投宿處逢人更問向前程

宿天竺寺寄靈隱寺僧

夜向靈谿息此身風泉竹露淨衣塵月明石
上堪同宿那作山南山北人

送元紹

春日同遊漳水邊如今重說恨綿綿天涯相
見還離別客路秋風又幾年

喜王六同宿

十八年來恨別離唯同一宿詠新詩更相借
問詩中語共說如今勝舊時

張司業詩集卷第八

聯句

會合聯句

韓愈
張籍

孟郊

張徹

離別言無期會合意彌重籍病添兒女戀老

喪丈夫勇愈劔心知未謝詩思猶孤聳郊愁

去劇箭飛懼來若泉湧徹析言多新貫攄抱

無昔擁籍念難須勤追悔易勿輕踵愈吟巴

山卓犖說楚波堆壘郊馬辭虎豹怒舟出蛟

鼉恐徹狂鯨時孤軒幽狄雜百種愈瘴衣常

腥膩蠻器多踈冗籍剥苔弔班林角飯餌沉

塚愈忽爾銜遠命歸歟舞新寵郊鬼窟脫幽

妖天居覲清拱愈京遊步方振謫夢意猶恂

籍詩書誇舊知酒食接新奉愈嘉言寫清越

瘡病失朮腫郊夏陰偶高庇宵魄接虛擁愈

雪絃寂寂聽茗盃纖纖捧郊馳輝燭浮螢幽

響泄潛螿愈詩老獨何心江疾有餘虺郊我

家本漚穀有地介臯鞏休跡憶沈冥峨冠慙

闡郊升朝高轡逸振物群聽悚徒言濯幽

泌誰與薙荒茸籍朝紳鬱青綠馬飾曜珪珙

國讎未銷鑠我志蕩叩隴郊君才誠侷儻時

論方洵溶格言多彪蔚懸解無桔拳張生得

淵源寒色拔山冢堅如撞群金眇若抽獨蛹

愈伊余何所擬跛鼈詎能踊塊然墮岳石飄

爾胃巢郊龍旆垂天衛雲韶凝禁甬君胡

眠安然朝鼓聲洶洶

春池泛舟聯句 裴度 劉禹錫 崔群 賈餗

鳳池新雨後池上好風光 上相公 取酒愁春

盡留賓喜日長 度送 柳絲迎畫舸水鏡寫雕

梁群送賈閣長潭洞迷仙府煙霞認醉鄉司業送張

鷺聲隨笑語竹色入壺觴籍送客晚景含澄徹

時芳得艷陽禹錫飛鳧拂輕浪綠柳暗回塘

度逸韻追安石高居勝辟彊群杯停新令舉

詩動綵牋忙餗顧謂同來客歡遊不可忘籍

宴興化池亭送白二十二東歸聯句

裴白劉

東洛言歸去西園告別來白頭青眼客池上

手中杯度離瑟殷勤奏仙丹委曲回征輪今

欲動賓閣為誰開禹錫坐弄琉璃水行登綠

縹苔花低粧炤影苹散酒吹醅居易岸蔭新

抽竹亭香欲變梅隨遊多笑傲遇勝且徘徊

籍澄澈連天鏡潺湲出地雷林塘難共賞鞍

馬莫相催度信及魚還樂機忘鳥不猜晚晴

槐起露新暑石添苔禹錫擬作雲泥別猶思

頃刻陪歌停珠貫斷飲罷玉峯頽居易雖有

消搖志其如磊落才會當重入用此去肯悠

哉籍

首夏猶清和聯句

裴白劉

記得謝家詩清和即此時居易餘花數種在

密葉幾重垂度芳謝人人惜陰成處處宜禹

錫水萍爭點綴梁燕共追隨行式亂蝶憐踈

藥殘鶯戀好枝籍草香殊未歇雲勢漸多奇

居易單服初寧體新篁已出籬度與春為別

近覺日轉行遲禹錫遶樹風光少侵階苔蘚

滋行式唯思奉歡樂長得在西池籍

薔薇花聯句

裴白劉

似錦如霞色連春接夏開禹錫波紅分影入

風好帶香來度得地依東閣當階奉上台行

式淺深皆有態次第暗相催禹錫滿地愁英

落綠隄惜棹回度芳濃濡雨露明麗隔塵埃

行式似着煙脂染如經巧婦裁居易柰花無

別計只有酒殘杯籍

西池落泉聯句

裴白劉

東閣聽泉落能令夜興多行式散時猶帶沫

淙處却跳波度偏洗磷磷石還驚泛泛鷺籍

色清塵不染光白月相和居易噴雪縈松竹

攢珠濺芰荷禹錫對吟時合響觸樹更搖柯

籍照圃紅分藥侵堦綠浸莎居易日斜車馬

散餘韻逐鳴珂禹錫

張司業詩集拾遺

三原李氏園讌集

暮春天早熟邑居苦囂煩言從君子樂樂彼
李氏園園中有草堂池引涇水泉開戶西北
望遠見嵯峨山借問主人翁北州佐戎軒僕

夫守舊居為客施榻筵高壤有餘滋竹樹芳
且鮮傾我所持觴盡日共留連踈拙不偶俗
常喜形體閑况來幽棲地不能重笑言

山中疇人

山中日暖春鳩鳴逐水看花任意行向晚歸
來石窓下菖蒲葉上見題名

岳州晚景

晚景寒鴉集秋聲旅鴈歸水光浮日去霞彩
映江飛洲白蘆花吐園红柿葉稀長沙卑濕

地九月未成衣

水

蕩漾空沙際
虛明入遠天
秋光照不極
鳥色去無邊
勢引長雲闊
波輕片雪連
汀洲杳難測
萬古覆蒼煙

和李僕射西園

過午歸閑處
西亭敞四簷
高眠着琴枕
散帙檢書籤
印在休通客
山晴好捲簾
竹涼蠅少到
藤暗蝶爭潛
晚鵲頻驚喜
踈蟬不許拈
石

苔生紫點攔藥吐紅尖
虛坐詩情遠幽探
道不兼所營當勝地
雖儉復誰嫌

右五詩見木鐸集木鐸者司業詩之別名也前國子監書庫官張元龍震發得於故家張氏問其由來則皇祐三年舍人毗陵錢公輔通守越郡時得於太守楊君云張洎家本也眡他本最字大略與今所刻司諫湯公家藏本相出入而此五詩則今刻本無之今刻本第六卷

贈項斯七言則木鐸集闕焉因互見云

魏峻併識

張司業詩集附錄

此日足可惜一首贈張籍

韓吏部愈

此日足可惜此酒不足嘗捨酒去相語共分
一日光念昔未知子孟君自南方自矜有所
得言子有文章我名屬相府欲往不得驤思
之不可見百端在中腸維時月魄死冬日朝
在房驅馳公事退聞子適及牆命車載之至
引坐於中堂開懷聽其說徃徃副所望孔丘

歿已遠仁義路久荒紛紛百家起詭怪相披
猖長老守所聞後生習爲常少知誠難得純
粹古已亡譬彼植園木有根易爲長留之不
遣去館置城西旁歲時未云幾浩浩觀湖湘
衆夫指之笑謂我知不明兒童畏雷電魚鼈
驚夜光州家舉進士選試繆所當馳辭對我
策章句何煒煌相公朝服立工席歌鹿鳴禮
終樂亦闕相拜送於庭之子去須臾赫赫流
盛名竊喜復竊歎諒知有所成人事安可怛

奄忽令我傷聞子高第日正從相公喪哀情
逢吉語愀怳難爲雙暮宿偃師西展轉在空
牀夜聞汴州亂遶壁行傍徨我時留妻子倉
卒不及將相見不復期零落甘所丁驕女未
絕乳念之不能忘忽如在我前耳若聞啼聲
中途安得返一日不可更俄有東來說我家
免罹殃乘船下汴水東去趨彭城從喪朝至
洛還走不及停假道經盟津出入行澗岡日
西入軍門羸馬顛且僵主人願少留延入陳

壺觴卑賤不敢辭忽忽心如狂飲食豈知味
絲竹徒轟轟平明脫身去決若驚鳧翔黃昏
次汜水欲濟無舟航號呼久乃至夜濟十里
黃中流上沙灘沙水不可詳驚波暗合昏星
宿爭翻芒馬乏復悲鳴左右泣僕童甲午憩
時門臨泉窺鬪龍東南出陳許陂澤平茫茫
道邊草木花紅紫相低昂百里不逢人角角
雉雉鳴行行二月暮巧及徐南疆下馬步堤
岸上船拜吾兄誰云經艱難百口無夭殤僕

射南陽公宅我睢水陽篋中有餘衣盎中有
餘糧閉門讀書史清風窓戶涼日念子來遊
子豈知我情別離未爲久辛苦多所經對食
每不飽共言無倦聽連延三十日晨坐達五
更我友二三子宦遊在西京東野窺禹穴李
翱觀濤江蕭條千萬里會合安可逢淮之水
舒舒楚山直叢叢子又捨我去我懷焉所窮
男兒不再壯百歲如風狂高爵尚可求無爲
守一鄉

醉贈張祕書

人皆勸我酒我若耳不聞今日到君家呼酒
持勸君爲此座中客及余各能文君詩多態
度藹藹春空雲東野動驚俗天葩吐竒芬張
籍學古淡軒昂避雞群阿買不識字頗知書
八分詩成使之寫亦足張吾軍所以欲得酒
爲文俟其醺酒味旣冷冽酒氣又氤氲性情
漸浩浩諧笑方云云此誠得酒意餘外徒續
紛長安衆富兒盤饌羅羶葷不解文字飲惟

能醉紅裙雖得一餉樂有如聚飛蚊今我及
數子固無猶與薰險語破鬼膽高詞媿皇墳
至寶不雕琢禪功謝鋤耔方今向泰平元凱
承華勛吾徒幸無事庶以窮朝曛

贈張籍

吾老嗜讀書餘事不挂眼有兒雖甚憐教示
不免簡君來好呼出踉蹌越門限懼其無所
知見則先愧赧昨因有緣事上馬插手版留
君住廳食使立侍盤棧薄暮歸見君迎我笑

而芎指渠相賀言此是萬金產吾愛其風骨
粹美無可揀試將詩義授如以肉貫弗開祛
露毫末自得高蹇嶮我身蹈丘軻爵位不早
縮固宜長有人文章紹編剗感荷君子德悅
若乘朽棧召令吐所記解摘了瑟憊顧視窓
壁間親戚競覘嚮喜氣排寒冬逼耳鳴睨眈
如今更誰恨便可耕灞滻

調張籍

李杜文章在光艷萬丈長不知群兒愚那用

故謗傷虬蟬撼大樹可笑不自量伊我生其
後舉頸遙相望夜夢多見之晝思反微茫徒
觀斧鑿痕不矚治水航想當施手時巨刃磨
天揚垠崖劃崩豁乾坤擺雷礮惟此兩夫子
家居率荒涼帝欲長吟哦故遣起且僵翦翎
送籠中使看百鳥翔平生千萬篇金薤垂琳
琅仙官勅六丁雷電下取將流落人間者太
山一毫芒我願生兩翅捕逐出八荒精誠忽
交通百怪入我腸刺手拔鯨牙舉瓢酌天漿

張詩集
騰身跨汗漫不着織女襄顧語地上友經營
無太忙乞君飛霞珮與我高頡頏

病中贈張十八

中虛得暴下避冷卧北窓不蹋曉鼓朝安眠
聽逢逢籍也處問里抱能未施邦文章自娛
戲金石日擊撞龍文百斛鼎筆力可獨扛談
舌久不掉非君亮誰雙扶几導之言曲節初
縱縱半途喜開鑿派別失大江吾欲盈其氣
不令見麾幢牛羊滿田野解旆東空扛傾樽

與斟酌四壁堆甕缸玄帷隔雪風照鑪釘明
缸夜闌縱捩闔哆口踈眉龐勢侔高陽翁坐
約齊橫降連日挾所有形軀頓降肱歸將乃
徐謂子言得無唵迴軍與角逐斫樹收窮龐
雌聲吐款要酒壺綴羊腔君乃崑崙渠籍乃
嶺頭瀧譬如蟻垤微詎可陵崆峒幸願終賜
之斬拔枿與椿從此識歸處東流水淙淙

晚寄張十八助教周郎博士

日落風景曠出歸偃前簷晴雲如擘絮新月

似磨鎌田野興偶動衣冠情久厭吾生可攜
手歎息歲將淹

題張十八所居

君居泥溝上泥濁萍青青蛙謹橋未掃蟬嘒
門長扃名秩後千品詩文齊六經端來問竒
字爲我講聲形

翫月喜張十八負外與王祕書至

前夕雖十五月長未滿規君未晤我時風露
渺無涯浮雲散白石天宇開青池孤質不自

憚中天爲君施翫翫夜遂久亭亭曙將披况
當今夕圓又以嘉客隨惜無酒食樂但用歌
嘲爲

與張十八同效阮步兵一日復一日

一日復一日一朝復一朝祗見有不如不見
有所超食作前日味事作前日調不知久不
死憫憫尚誰要富貴自繫拘貧賤亦煎焦俯
仰未得所一世已解鑣譬如籠中鶴六翮無
所搖譬如兔得跡安用東西跳還看古人書

復舉前日瓢未知所究竟且作新詩謠

詠雪贈張籍

祇見從橫落寧知遠近來飄飄還自弄歷亂
音誰催座暖銷那怪池清失可猜坳中初蓋
底垤處遂成堆慢有先居後輕多去却迴度
前舖瓦隴奔發積牆隈穿細時雙透乘危忽
半摧舞深逢坎井集早值層臺砧練終宜擣
階紈未暇裁城寒裝睥睨樹凍裏莓苔片片
勻如翦紛紛碎若按定非燐鷓鷯真是屑瓊

瑰緯繡觀朝萼溟茫矚晚埃當窓怕凜凜出
戶即皚皚壓野榮芝菌傾都委貨財娥嬉華
蕩漾胥怒浪崔嵬磧迴疑浮地雲平想輾雷
隨車翻縞帶逐馬散銀杯萬屋漫汗合千株
照曜開松篁遭挫抑糞壤獲饒培隔絕門庭
遽擠排陞級纒豈堪裨岳鎮強欲效鹽梅隱
匿瑕疵盡包羅委瑣該誤雞宵呢喔驚雀暗
徘徊浩浩過三暮悠悠市九垓鯨鯢陸死骨
玉石火炎灰厚慮溟溟壑高愁撒斗魁日輪

埋欲側坤軸壓將頽岸類長蛇攪陵猶巨象
逐水官夸傑黠木氣怯胚胎着地無由卷連
天不易推龍魚冷蟄苦虎豹餓號哀巧借奢
豪便專繩困約災威貪凌布被光肯離金壘
賞玩捐他事歌謠放我才狂教詩碑斫興與
酒陪鰓惟子能諳耳諸人得語哉助留風作
黨勸坐火爲媒雕刻文刀利搜求智網恢莫
煩相屬和傳示及提孩

贈張十八助教

籍

喜君眸子重清朗攜手城南歷舊遊忽見孟
生題竹處相看淚落不能收

賀張十八祕書得裴司空馬

司空遠寄養初成毛色桃花眼鏡明落日已
曾交轡語春風還擬並鞍行長令奴僕知饑
渴須着賢良待性情旦夕公歸伸拜謝免勞
去騎逐雙旌

雨中寄張博士籍侯主簿喜

放朝還不報夜半蹋泥歸雨慣曾無節雷頻

自失威見牆生菌徧憂麥作蛾飛歲晚徧蕭
索誰當救晉饑

早春與張博士籍遊楊尚書林亭寄
第三閣老兼呈白馮二閣老

牆下春渠入禁溝渠冰初破滿渠浮鳳池近
日長先暖流到池時更不流

同張水部籍遊曲江寄白二十二舍

人居易

漠漠輕陰晚自開青春白日映樓臺曲江水

滿花千樹有底忙時不肯來

和張水部勅賜櫻桃

漢家舊種明光殿炎帝還書本草經豈似滿
朝承雨露共看傳賜出青冥香隨翠籠擎初
重色照銀盤瀉未停食罷自知無所報空然
慙汗仰皇扃

早春呈水部張十八員外二首

天街小雨潤如酥草色遙看近却無最是一
年春好處絕勝煙柳滿皇都

其二

莫道官忙身老大即無年少逐春心憑君先到江頭看柳色如今深未深

讀張籍古樂府詩 白侍郎 居易

張君何爲者業文三十春尤工樂府詩舉代少其倫爲詩意如何六義互鋪陳風雅比興外未嘗著空文讀君學仙詩可諷放佚君讀君董公詩可誨貪冒臣讀君商女詩可感悍婦仁讀君勤齊詩可勸薄夫淳上可裨教化

舒之濟萬民下可理情性卷之善一身始從青衿歲迨此白髮新日夜秉筆吟心苦力亦勤時無采詩官委棄如泥塵恐君百歲後滅没人不聞願藏中祕書百代不湮淪願播內樂府時得聞至尊言者志之苗行者文之根所以讀君詩亦知君爲人如何欲五十官小身賤貧病眼街西住無人行到門

贈張十八

諫垣幾見遷遺補憲府頻聞轉殿監獨有詠

詩張太祝十年不改舊官銜

喜張十八博士除水部員外郎

老何歿後吟聲絕雖有郎官不愛詩無復篇
章傳道路空留風月在曹司長嗟博士官猶
屈亦恐騷人道漸衰今日聞君除水部喜於
身得省郎時

江樓晚眺景物鮮竒吟玩成篇寄水

部張員外

杭州

澹煙疎雨間斜陽江色鮮明海氣涼蜃散雲

收破樓閣虹殘水照斷橋梁風翻白浪花千
片鴈點青天字一行好着丹青圖寫取題詩
寄與水曹郎

雨中招司業宿

過夏衣香潤迎秋簟色鮮斜支花石枕卧詠
藥珠篇泥滓非遊日陰沉好睡天能來同宿
否聽雨對牀眠

酬張十八訪宿見贈

昔我爲近臣君嘗稀到門今我官職冷唯君

來往頻我受狷介性立為頑拙身平生雖寡
合合即無緇磷况君秉高義富貴視如雲五
侯三相家眼冷不見君問其所與遊獨言韓
舍人其次即及我我愧非其倫胡為謬相愛
歲晚逾勤勤落然頽簷下一話夜達晨床單
食味薄亦不嫌我貧日高上馬去相顧猶逡
巡長安久無雨日赤風昏昏憐君將病眼為
我犯埃塵遠從延康里來訪曲江濱所重君
子道不獨愧相親

寄張十八

飢止一簞食渴止一壺漿出入止一馬寢興
止一牀此外無長物於我有若亡胡然不知
足名利心遑遑念茲彌懶放積習遂為常經
旬不出門竟日不下堂同病者張生貧僻住
延康慵中每相憶此意未能忘迢迢青槐街
相去八九坊秋來未相見應有新詩章早晚
來同宿天氣轉清涼

答張籍因以代書

憐君馬瘦衣裘薄許到江東訪鄙夫今日正
閑天又暖可能扶病暫來無

醜張太祝晚秋卧病見寄

高才淹禮寺短羽翔禁林西街居處遠北闕
官曹深君病不來訪我忙難往尋差池終日
別寥落經年心露濕綠蕪地月寒紅樹陰况
茲獨愁夕聞彼相思吟上嘆言笑阻下嗟時
歲侵容衰曉窓鏡思苦秋絃琴一章錦繡段
八韻瓊瑤音何以報珍重慙無雙南金

曲江獨行招張十八

曲江新歲後冰與水相和南岸猶殘雪東風
未有波偶遊身獨自相憶意如何莫待春深
去花時鞍馬多

酬韓侍郎張博士雨後遊曲江見寄

小園新種紅櫻樹閑遶花行便當遊何必更
隨鞍馬隊衝泥蹋雨曲江頭

逢張十八負外籍

旅思正茫茫相逢此道傍晚嵐林葉闇秋露

草花香白髮江城守青衫水部郎客亭同宿
處忽似夜歸鄉

張十八負外以新詩二十五首見寄
郡樓月下吟翫通夕因題卷後封寄
微之

秦城南省清秋夜江郡東樓明月時去我三
千六百里得君二十五篇詩陽春曲調高難
和淡水交情老始知坐到天明吟未足重封
轉寄與微之

和令狐相公言懷寄河中楊少尹

劉賓客禹錫

章句慙非第一流世間才子昔陪遊吳宮已

歎芙蓉死

張司業詩云吳宮四面秋
江水天青露白芙蓉死

邊月空

悲蘆管秋

李尚書

任向洛陽稱傲吏

分司白
賓客苦

教河上領諸侯

天平相公

石渠甘對圖書老關外

楊公安穩不

裴相公見示荅張祕書謝馬詩并群
公屬和因命追作

草玄門戶少塵埃丞相并州寄馬來初自塞
垣銜首箝忽行幽徑破莓苔尋花緩轡威遲
去帶酒垂鞭躑躅回不與王侯與詞客知輕
富貴重清才

張郎中籍遠寄長句開緘之日已及
新秋因舉目前仰酬高韻

南宮詞客寄新篇清似湘靈促柱弦京邑舊
遊勞夢想歷陽秋色正澄鮮雲銜日脚成山
雨風駕潮頭入渚田對此獨吟還獨酌知音

不見思蒼然

自昔名人勝士生平遊歷之地世傳以
爲美談而物之經品題者一時亦爲之
增重錢塘之人以歐公不一來爲恨東
坡謂江山竒麗秀絕之氣常爲能文者
用西湖特公几案間一物所謂言有大
而非誇者也唐張司業樂府世多傳罕
有盡得其他詩者侍講司諫湯公獨表
而出之司業所居里舊史略弗錄新史

稱爲和州烏江人未有質其居吳者司
諫始訂而信之峻嘗誦司業詩有學者
號韓張之句世無韓吏部不當在弟子
列其磊磊落落在人耳目者如此而遺
風餘韻邦人弗傳圖志弗載世之泯滅
不少概見者可勝道哉峻旣刊司業詩
因取以補郡志之闕遂爲中吳一段奇
事淳祐丙午立春日壽春魏峻識

張司業詩集

